

欽定剿平粵匪方略

欽定勦平粵匪方略卷一百二 甲寅年

閏七月初十日

丁丑

陳金綬雷以誠奏言前月二

十七日臣以誠因急須赴皖當往琦善營中面
商一切見其形容清減詢悉腹瀉日久所致不
意初三日早間復添頭暈痰壅氣喘等證醫治
無效竟於未刻因病出缺所有

欽差大臣關防先經琦善派令江甯藩司文煜護理

其身後一切事宜臣等妥爲照料並懇

迅賜簡放重臣俾資統率再臣以誠本擬將經手事件
交代清楚卽日赴皖因文煜一時未能接辦是
以暫緩起程奏入

上命軍機大臣傳諭陳金綬雷以誠德興阿曰琦善因
病出缺已授托明阿爲欽差大臣馳驛前往督辦現
在瓜州賊匪尙在負嵎該逆知琦善病故勢必乘隙

窺伺水陸防勦萬分緊要托明阿抵揚尙需時日所
有欽差大臣關防著交陳金綬暫行接辦雷以誠尙
未起程赴皖並著留於軍營會同陳金綬將防勦事
宜妥爲經理前據邵燦奏由陸路赴皖與袁甲三會
審案件著陳金綬等卽傳旨飭令該漕督行抵安徽
後暫留該省辦理勸捐防堵事宜雷以誠駐紮萬福
橋距大營較遠自應與陳金綬同在一處和衷商榷

更爲妥協其裏下河練勇及經手事件卽飭文煜趕
緊接辦現在副都統德興阿帶滿漢官兵駐紮運河
西岸托明阿未到以前卽責成陳金綬雷以誠及該
副都統督飭水陸將弁相機進剿迅圖克復瓜州毋
得專待托明阿致延時日其浦口等處仍嚴飭武慶
等實力防剿毋稍疏懈

上又命軍機大臣傳諭僧格林沁托明阿曰陳金綬等

奏琦善因病出缺已降旨授托明阿爲欽差大臣馳
驛前往揚州督辦軍務現在瓜州賊匪負嵎死守此
時軍無統帥逆賊得信必更肆其猖獗托明阿接奉
此旨後卽著星夜馳驛迅往揚州接辦到揚以後水
陸各營均歸節制兵力已多此次就道毋庸多帶官
兵行走致有稽遲托明阿經朕簡畀重任卽當勉奏
膚公悉心籌畫與陳金綬雷以誠等迅殄妖氛以慰

廬念至江防最爲扼要金陵鎮江皆與瓜州一水相通抵揚後尤當與向榮等隨時咨商聯絡聲氣不可稍存意見其連鎖之賊已被套隄圍因此時托明阿雖赴揚州並未多帶官兵前往連鎖窮蹙之寇以巨萬兵勇足敷剿辦僧格林沁務卽督率將弁剋期殄滅埽穴擒渠斷不准任其潛逃爲患

上又命軍機大臣傳諭向榮怡良吉爾杭阿曰昨據向

榮奏賊船由蕪湖江口竄擾東壩情形甚爲喫緊東壩爲蘇杭門戶亟須嚴爲堵扼副將傅振邦等所帶兵勇二千雖兩次獲勝而探聞逆黨甚多必得飛催福興等合力進剿以期醜類肅清不致深入所稱趕調上海兵勇二三千名守護蘇州上海正當剿賊喫緊之際兵勇能分調若干著吉爾杭阿統籌全局酌量辦理怡良現駐蘇州距東壩較遠著卽於常州無

錫一帶擇要駐紮遏賊來路既可固蘇省之藩籬並
可爲福興等後路援應賊匪覬覦蘇常爲糧米所出
恐由徽甯竄擾急宜防護著怡良吉爾杭阿妥籌辦
理琦善現在病故已有旨授托明阿爲欽差大臣馳
往揚州督辦軍務未到以前著陳金綬暫行代辦所
有水陸軍營各事宜仍著向榮隨時咨商妥辦毋得
稍分畛域

上諭內閣曰欽差大臣琦善嘉慶年間由部曹外任司
道洊厯封疆蒙

皇考宣宗成皇帝畀以兼圻重任晉贊綸屏疊經獲咎
旋即起用朕御極後因其在陝甘總督任內辦理番
務未能允洽加以嚴譴旋因粵匪肆擾特賞給三品
銜署理河南巡撫並授爲欽差大臣賞給都統銜督
兵赴江北一帶進剿該大臣自抵揚州軍營後屢獲

勝仗賞戴花翎復因揚州竄出賊匪未能嚴防截剿
革去都統銜近日進攻瓜州賊巢復命統領水師疊
次獲勝一切調度均合機宜方冀其克復瓜州肅清
江面遽聞溘逝悼惜殊深琦善著追贈太子太保協
辦大學士並賞總督銜卽照總督軍營病故例賜卹
准其入城治喪任內一切處分悉予開復應得卹典
該衙門察例具奏伊子員外郎恭釗筆帖式恭鈞恭

鏗百日孝滿後均著該旗帶領引見並查明琦善尙有幾子先行具奏

上又諭內閣曰前任江甯將軍托明阿著授爲欽差大臣馳驛前往揚州督辦軍務

十一日
戊寅軍機大臣戶部會奏言遵議陝西巡

撫王慶雲奏請飭各路糧臺運儲糧石一摺臣等檢查嘉慶初年陝西用兵籌運糧米成案悉

心覈議查自軍興以來疊奉

諭旨飭令琦善向榮勝保等各軍營運儲米石以充軍

食如湖北湖南江西江安等省咸豐三年應運
二年分漕糧均准截留本省並接濟鄰省作爲
軍糈大兵所至准其就近支取本年山東折漕
留爲勝保軍需並聲明出入之閒不免折耗卽
將米石撥營備用此外如各屬倉社米穀均准

軍營關支又如僧格林沁等軍營紳民捐助糧
草均與捐輸銀錢一律請獎各路糧臺如果實
力遵照辦理日支八合三勺所需糧石支放自
可裕如月支銀九錢所撥銀兩何至動虞缺乏
此銀糧兼支尤爲現時要務之實在情形也該
撫所請酌復舊例行令各路糧臺運儲糧石以
備兼支之處自係爲覈實撙節起見臣等公同

商酌現在糧臺未見充裕與其空文支領給發不能應時何如按日支糧兵丁得沾實惠應請

飭下各路帶兵大臣及各該督撫嚴飭糧臺承辦各員查照日支口糧米八合三勺月支鹽菜銀九錢舊例設法先期運儲糧石並查覈該撫原奏妥爲籌辦至原奏所未備及各就各省簡便之處臣等查軍需則例內載兵丁加給鹽菜銀四錢

無論本省別省統於出邊口之日加給凱旋進
邊口之日停止等語現在賊氛滋擾正當攻勦
喫緊之際征兵一項擬請仍於鹽菜項下按月
加給銀四錢以示體恤凱旋進邊口之日卽行
停止其各路防兵卽照舊例覈支毋庸加給銀
四錢以示區別又各省情形不同均宜熟籌簡
便之法查湖北湖南江西江安等省咸豐二三

年分及山東三年分漕糧均未起運卽或輾變亦應仍有餘存除江西三年分漕糧已報折價銀四十餘萬兩外其餘徵存未運漕糧均准各該糧臺就地動用並准碾動各州縣倉穀以資接濟其無漕各省均令於所屬倉穀項下酌量關支仍將動用漕倉糧石數目分晰報部查覈總之行軍首重芻糧計兵一萬每月祇需儲糧

二千五百石各省比歲有秋措辦尙易爲力其
或應動項採買或可勸諭捐輸或令鄰省轉運
接濟各處情形不同臣等亦礙難懸斷應由帶
兵大臣及各該督撫體察情形通融妥辦如此
則兵食無虞缺乏經費不致多糜於現在軍情
實屬大有裨益奏入

上從之

十二日己卯勝保德勒克色楞善祿崇恩奏言臣

等於上月二十七日督兵進攻高唐州城獲勝
旋因大雨距城濠數十步之遙水深二三尺不
等當卽設法引水由城北大道開挖向北宣洩
連日以來已形淺涸本月初四日夜賊由東北
潛出約數百人至我兵所挖長濠之處用土平
墊乘夜衝撲而出隨抽派天津正定官兵分東

西兩路前往橫截該逆甫經過濠我兵施放槍
礮賊卽紛紛退匿濠外我兵伏行而前奮勇刺
殺賊衆披靡敗回我兵追近東關城濠賊於城
頭密放槍礮因黑夜未便再進現在崇恩已由
武定回營臣及德勒克色楞善祿等悉心籌度
約於一二日內天氣晴霽設法進攻惟賊既有
突竄之意尤當格外嚴防現今馬隊官兵分投

探悉路徑以便隨時追截並飭農民將秋禾及早刈割以免賊匪隱藏魏家灣濱臨運河停泊運船甚多已飛飭糧道將該處糧船移撤下游萬一賊竄不致奪船渡河現復剋日興工趕鑄大礮惟有竭盡心力迅速圖功

勝保又奏言查本地民人李啟昌因被賊擾害情願入城作爲內應以助官軍殺賊臣查其意

甚誠當卽密授機宜許以功成之日破格獎賞
奏八

上命軍機大臣傳諭勝保德勒克色楞善祿崇恩曰據
稱宜洩積水鑄造大礮均不免過於迂緩其遣人內
應一節尤屬毫無把握此時總以四面齊攻立破州
城將該逆就地殲滅方爲上策若任其突竄再圖追
襲雖勦辦較易仍恐別有蔓延據奏飭令附近州縣

刈割秋禾並將魏家灣船隻移撤下游均爲豫防賊
竄起見該大臣所籌多派馬兵分投探路現在該逆
尙未竄出焉能必其經由何路徒分馬隊之力亦非
良策崇恩現已回營德勒克色楞善祿等均已四面
嚴扼卽著勝保督飭各路兵勇迅速環攻務將該逆
就地剿滅如有竄出零匪卽著崇恩嚴飭各該州縣
汛兵練勇節節扼截以便馬隊跟蹤緊剿儻不豫爲

布置致該逆再有踞城抗拒之事朕惟該大臣等是問

十三日庚辰僧格林沁西凌阿托明阿奏言初七

日夜間該逆大股梟水乘船潛向珠勒亨綳闊分防之處奔來綳闊等俟槍箭可及揮令官兵開放槍箭逆匪紛紛傷斃餘匪仍向上撲我兵槍礮連環復用藥包向下擊放該匪火藥船隻

被燃燒斃逆匪甚多各營開放大礮從旁轟擊
逆匪始行敗回臣等現嚴飭各營加意嚴防相
機迅圖殄洗奏入報

同日向榮奏言據副將傅振邦稟報七月二十
五日東壩之戰逆首羅大綱卽羅亞旺率衆竄
走高淳東壩上下已無餘匪福興帶兵於二十

八日馳抵高渚之毛公鋪探得逆匪趕築土城礮臺賊船均停泊附近意圖占踞我兵由東北隅蘆蕩襲擊該逆驚駭卽棄土城奔避上船我軍趕殺斃賊百數十名燒燬賊船八九十隻餘船由丹陽湖向花津逸去該逆知我大營兵分力薄於三十日率黨四五千分股由南路至七橋窺撲川兵捷勇營盤相隔小河槍礮互

擊我軍潛從上流鳧水而過繞出賊後直前衝
殺俘斬長髮二百餘人奪獲擡礮鳥槍一百餘
桿刀矛旗幟多件閏七月初一日該逆突由洪
武門出衆數千至河定橋上方橋一帶縱火來
抄七橋壘營江甯將軍蘇布通阿督同參將張
國樑等堅壁不動伺賊氣懈分投縱擊該逆抵
拒不退適參將蔡應龍守備馮子材帶領兵勇

分左右抄出刺中騎馬賊目一人賊衆驚駭始
大奔潰追斬數百級賊復於初二日由洪武門
通濟門雨花臺分出三股先撲七橋壑又於朝
陽太平兩門出賊二股從龍脖子左右撲下窺
我湖南營盤當經楚兵分隊出禦該逆見我人
少兩面抄來都司銜陶茂森首先衝入賊隊賊
皆披靡時南韶兵亦趕到夾攻大加勦擊擒斬

百有餘人該逆竄回龍脖子山梁伏匿不退意圖牽掣維時七橋壘各營該逆分股圍撲不下萬人蘇布通阿親扼橋口督戰張國樑率精銳數十人冒賊裝束突入賊中手刃逆匪數十人該逆莫辨真僞自相擊殺賊衆大亂時有另股賊匪縱火延燒高橋門一帶經蔡應龍領兵馳往要擊砍殺不少追奔數里復會合七橋壘各

兵勇大加殲擒逆衆落水淹溺無算餘俱逃竄
通濟門雨花臺而去是日之戰自卯至申我兵
勇無不以一當百殺賊最多三日之中約計斃
賊不下三千餘人割獲首級五百七十六顆髮
辮耳記二百五件生擒三百五十六人內有僞
丞相譚應桂訊明正法奪獲槍礮刀予旗械不
計其數查點我軍兵勇稍有傷亡其水師各船

葉常春督駕拖罾四隻與吳全美紅單各船會
合駛至下關江面見賊礮臺礮隄層層遮護我
船偏近轟擊先後毀去礮臺七座大小賊船一
百餘隻復燒燬七里洲水營二座賊黨焚溺甚
多並擊斃礮隄執旗賊目五人餘船悉數逃入
夾江我船勦洗而上直抵三山營江面分扼駐
泊初二日上游來船三百餘隻中有黃衣賊渠

指揮迎敵吳全美先令五船沿北岸而上盡將賊船讓過橫截其後前面各師船見賊船已近始將大礮齊發查紅單水師各船礮位環布運掉如飛各水手又能躍入波濤跳上賊船該逆驚駭進退無路遂紛紛投江自溺無一得脫者奪獲大小船二百六十餘隻生擒賊匪二百餘人凡江上所遇賊船一掃而空訊據賊供逆首

秦曰綱中礮落水其餘陳繼書余幅泉等僞官
多人亦皆擊斃惟尙有賊船一百餘號避匿口
內不敢出江現檄福興挑選兵勇另乘小船入
湖務期勦滅淨盡臣查我軍以少擊衆三戰三
捷又經師船痛勦使上游賊援一斷卽陸路亦
易得手所有此次水陸出力員弁懇請

恩准擇尤保奏再查鎮江賊匪被勦情急經余萬清設

法解散逃出頗多四面布置情形亦俱周妥並據報七月二十七日及本月初二日出隊攻城均有斬獲奏入

上命軍機大臣傳諭向榮曰覽奏稍慰朕懷此次陸路殺賊不下三千餘人水師亦將賊船沈毀殆盡並擊斃逆首秦曰綱一名該逆狡獪已久經此大創洵足以寒賊膽而振軍威粵東紅單船本係得力舟師一

經調度合宜卽可指揮如意所稱上游賊援一斷卽
陸路亦易得手此是一定之理向榮正可乘此聲威
督飭吳全美等統帶師船迎賊所向往來勦洗一面
親督陸路兵勇合力圍攻迅圖克復堅城殲擒首惡
爲次第肅清江面之計所有避匿高淳湖口賊船尙
有一百餘號仍著嚴飭福興挑水師兵勇竭力搜捕
悉數埽除仍須督飭該處派防將弁嚴扼逆衆乘虛

回竄之路至余萬清勦辦鎮江賊匪日久無功前經
降旨飭查原恐其不能得力究竟該革員於防勦事
宜能否獨當一面著向榮隨時察看據實具奏毋得
稍涉瞻徇

上諭內閣曰此次水陸各軍以少擊多三戰三捷均能
奮勇勦辦東壩竄匪亦尙迅速著向榮擇其尤爲出
力各員弁酌量保奏

同日楊需奏言賊匪於三月竄陷京山縣城安
襄鄖荆道羅遵殿飭巡檢諸鑣把總楊飛熊等
管帶襄勇會同知縣杜嘉善督率紳團疊次進
攻於五月二十六日將京山縣城收復又據孝
感縣知縣李殿華稟稱自三月至六月疊獲勝
仗七月初九日督率紳團潛赴河干乘風縱火
焚燒賊船數十隻城中伏勇亦放火十數處賊

匪驚潰開城逃竄與船中登岸之賊互相踐踏
練勇乘亂縱擊擒斬甚多旋即收復縣城又據
總兵雙保呈報馳赴天門縣督率署參將常德
等在漁薪河江家河等處與賊接仗四次燒燬
賊船八十餘隻生擒長髮賊首及土匪逆首孔
招汶等二百四十餘名溺水燒斃者無算七月
二十二日攻克城池又據知縣李殿華會同遊

擊孫學瀛等各帶兵勇與知縣章熙成之勇於
七月二十三日克復黃陂縣城池賊匪竄至河
東魯臺及六指店地方疊經兵勇擒斬二百餘
名又署黃州府知府許賡藻等督率團勇剿捕
麻城縣屬林河店等處賊匪擒斬無數焚燬賊
巢數十處進逼縣城該匪於夜半竄出南門復
被擒斬一百餘名次日收復縣城又沔陽州知

州蕭蔭恩督帶紳勇於六月二十五日克復州城其天門餘匪竄入應城縣屬之湖中與漢川賊匪勾結七月二十五日賊船數百隻駛至劉家隔經署提督佈克慎派守備鐵振國帶兵迎勦因衆寡不敵敗回賊匪進撲長江埠佈克慎督兵堵勦殺賊數十名弁兵亦有傷亡臣飛檄守備王榮帶兵馳往策應於二十七日會同進

勦擒獲長髮賊黃大得等六名殺斃溺斃不少
餘賊竄回漢川此次賊匪竄犯雖經擊退因守
備鐵振國迎擊敗回以致賊匪乘勢攻撲傷亡
兵弁應請將陝西督標千總瓜州營守備鐵振
國革職以示懲儆

楊需又奏言查黃州爲江防要地與武昌縣相
對爲省城下游第一重門戶黃州一失門戶洞

開省城不能一日安堵故收復省城卽須鎖鑰
武黃方可埽除沿江賊藪以通九江爲第二重
門戶因將規復黃州一事責成許廣藻等激勵
紳民相機辦理擬俟黃州復後卽分兵扼守武
黃旁收諸邑上援武漢下通九江至江北賊匪
現惟漢川一隅尙有竊踞已檄雙保等進兵若
克復漢川則江北大局羈定其時湖南兵勇復

乘勝南下則武漢已處垓心不難立時拔取然
後水陸並下會江西兵勇以扼九江庶可肅清
楚北應請

飭下江西撫臣派兵一出九江以樹江路之聲援一防
義甯以遏陸路之竄越實於大局有益

楊需又奏言臣前籌三路進兵之策嗣據官文
咨稱派總兵雙保由沔陽仙桃鎮一帶直達漢

陽福所爲後起接應知縣吳振鏞等由朱河赴
沔陽協勦漢陽守備鍾埈帶練克復沔陽疏通
道路直達漢陽此卽臣所籌三路之西路與臣
意見相合其時官文又改派福所張于銘赴安
陸協勦臣因安陸業已收復卽催福所等由鍾
祥徑赴漢川與雙保會合以攻漢陽尙慮水路
無兵可派適奉

諭旨將魁玉楊昌泗所帶之兵歸臣調遣因卽飛飭前赴襄陽簡精銳三千乘船順流而下爲兩路聲援其餘兵勇派員帶令來營爲留守德安及分布長江準一帶以斷各水口北竄之路茲復接官文來咨將吳振鏞黃鵬程魁玉楊昌泗鍾坊等兵勇或派防監利或留駐荆沙一概不令前來則西路之師僅雙保福忻二千人水路又成

畫餅惟餘孝感黃陂一路通計臣及桂明佈克
慎所帶之兵除馬隊一千僅能留駐楊店不能
前進外共止四千餘人未免太形單薄應請

飭下官文遵將魁玉楊昌泗所帶兵勇飭令照臣調派

辦理雙保福圻張于銘吳振鏞鍾埏之軍皆飭
令遵照原議切勿再行更調致失事機或荊州
需大員調遣則將魁玉酌留荊州飭楊昌泗前

來若慮兵單或將荆郡所收潰兵一千六百名
留荆協守再臣風聞留滇升用副將王國才勇
略兼優現留荆州仰懇

天恩准將王國才調赴行營實於克復事宜大有裨益
奏八

上命軍機大臣傳諭楊需曰現在京山等州縣均已收
復惟漢川尙爲賊踞江北大局已可羈有頭緒亟應

乘勢進攻楊需中路舟師由襄陽直達漢水原爲東西兩路聲援嗣因官文奏螺山緊要恐魁玉等折赴襄陽轉形迂緩是以准其所請令魁玉等沿北岸夾擊而下竟出大江卽可攻漢陽之正面今據楊需奏此項官兵全留荊州則中路無兵可派而吳振鐸鍾埭等所帶兵勇復經官文改派則西路之師亦形單薄所籌均係實在情形著楊需卽飛咨官文速飭楊

昌泗將原帶兵勇全數帶赴襄陽毋得再有推諉其
魁玉一員卽著管帶荊州所收餘兵一千六百名留
荊州交官文調遣張于銘由鍾祥赴漢川之勇吳振
鏞等由朱河赴沔陽之兵鍾埈由沔陽赴漢陽之練
丁均著悉照原議分路進剿不可再有更調當此軍
務喫緊之時若號令不能畫一將弁無所適從必致
貽誤大局此後楊需應如何調遣之處卽著一面奏

聞一面迅速布置不得因意見稍歧徒延時日

上又命軍機大臣傳諭官文曰官文前奏螺山緊要派令魁玉等前往協剿茲據楊需奏此項兵勇留荆則中路無兵可派而吳振鏞等所帶兵勇復經官文改派則西路亦形單薄著官文迅飭楊昌泗將原帶兵勇全赴襄陽勿稍延緩魁玉卽著管帶所收武昌兵勇一千六百名留在荊州應往何處防堵並著官文

妥爲調遣其張于銘吳振鏞鍾埈分帶之練勇均令
悉照原議不可再有更動參將王國才著官文卽飭
該員馳赴楊需行營以資差委總之此時攻剿緊急
軍營號令須歸畫一若因彼此意見不同紛紛更調
必致將弁無所適從所有進剿機宜均著統歸楊需
妥籌布置該將軍如有必須參酌之處卽與楊需熟
商籌辦不得稍分畛域

上又命軍機大臣傳諭陳啟邁曰前因逆匪竄踞九江郡城已有旨令陳啟邁嚴飭羅玉斌等統帶兵勇相機進剿茲據楊需奏稱武昌下通九江爲省城第二重門戶必須水陸並下會同江西兵勇以扼九江則楚北庶可肅清著陳啟邁速派兵勇一出九江以通江路之聲援一防義甯以遏路陸之竄越固江西之藩籬卽可保長江之門戶該撫不得以兵單爲詞置

全局於不顧

上諭內閣曰湖北被擾各州縣先經官文等奏報將沔陽州克復據楊需奏報克復京山等縣荆襄附近地方漸可肅清其竄逸餘匪仍著楊需嚴飭各該地方官迅速搜捕毋留餘孽甘肅瓜州營守備鐵振國迎剿不力著卽革職以示懲儆

同日駱秉章塔齊布曾國藩奏言七月二十一

日臣塔齊布親督陸營進勦行近城陵磯遙見該逆築有土城都司諸殿元拋擲火礮延燒賊壘帳棚逆賊敗竄正在跟追詎湖汊伏匪齊出諸殿元兵力太單力戰陣亡劉士宜同時被害臣塔齊布揮軍往救斃賊多名轉敗爲勝二十六日該逆悉銳來撲羅澤南等大呼衝突直趨高嶺陣斬僞國宗石姓賊始大潰其分撲鳳凰

山大營者數以萬計臣塔齊布親督將弁槍礮
齊施斃賊一二百名賊分路抄襲我軍亦分路
迎敵無不以一當百約斃賊六百餘名適羅澤
南等追至會合併攻又斃賊數十名賊被追過
河溺斃不計其數二十八日臣塔齊布直擣高
橋賊壘連斃數賊正衝突間大股續至適羅澤
南湘勇繞抄賊尾該逆後路受敵立即大潰周

鳳山等併力齊攻賊始敗退歸巢計共斃賊二百餘名生擒十餘名奪獲軍械旗幟馬贏無算二十九日賊分數股來撲我軍先燒附近民房臣塔齊布揮兵迎擊將中路之匪擊退其左右兩股亦經周鳳山羅澤南等殲斃無數其別隊千餘人亦經李續賓等橫截分抄槍斃賊目二名墜嶺死者不可勝計共殺賊五百餘名臣國

藩以賊勢全注陸路其水路必虛密飭各水軍
乘隙進剿楊載福等於是日率船進攻道員李
孟羣亦派戰船策應行近城陵磯見逆船十餘
往來馳突我軍見船卽擊一擁而前燒燬數隻
賊皆墜水東岸追至擂鼓臺西岸追至荊河腦
忽伏匪兩岸擁出希圖抄尾我軍愈奮轟擊無
遺把總秦國祿等深入賊巢賊遂大潰有此數

次大戰岳州可保無虞奏入

上命軍機大臣傳諭駱秉章塔齊布曾國藩曰逆賊竄擾岳州疊經我兵擊退茲復經水陸官軍奮勇齊進四次獲勝洵足以寒賊膽正可乘此聲威直搗武漢著塔齊布曾國藩將城陵磯餘匪迅速剿除淨盡卽日整師東下毋再延誤本日據楊需奏京山孝感等州縣先後收復現已派令佈克慎台湧帶兵由雙廟

進勦並令雙保福忻等由天門進取漢川魁玉楊昌
泗等由襄陽水路進趨漢口該署督亦卽日統師前
進此時南北兩路辦理均屬得手並經官文等奏報
已添撥兵勇派同知銜李光榮等統帶由調弦口協
勦當此官兵雲集應如何聯絡聲勢分投進逼之處
並著塔齊布等與楊需官文函商妥辦無失事機至
前諭塔齊布陸路官軍能否由通城崇隄一帶直攻

武昌之背並著悉心籌畫隨時奏報塔齊布曾國藩
自帶兵以來旣未嘗遇敗而怯定不致乘勝而驕總
宜於妥速之中持以慎重則楚省賊蹤漸可掃蕩岳
郡地屬緊要前諭駱秉章飭令胡林翼督帶練勇前
往嚴防該撫定已遵辦仍著將該臬司於何日抵岳
如何設防之處迅速馳奏

上諭內閣曰上竄湖南賊匪自前次擊敗後尙蟻聚城

陵磯此次岳州連日大獲全勝兵威愈振所有出力之知府羅澤南著以知府儘先選用並賞戴花翎守備楊名聲著以都司升用千總唐得升著以守備儘先補用兵丁李榮華著以把總儘先拔補並賞戴藍翎其水陸兩營員弁兵勇著擇其尤爲出力者酌量保奏都司諸殿元戰功疊著奮勇捐軀著交部從優議卹千總劉士宜著交部照例議卹

同日詹事府少詹事翁同書奏言金陵與浦口
六合祇隔一江臣以南北兩岸共辦一事必應
會商夾擊已函致武慶等毋分畛域合謀殲賊
查浦口水勇係本地團集不給口糧琦善常令
乘駕划船專守本地臣以爲沿江州縣皆可團
練水勇現在吳全美葉常春屢獲勝仗奪船頗
多若上游南岸州縣悉照浦口之例召募水勇

集賢堂 卷一百一
三
將所獲船隻分給配駕各守本地不費口糧一
遇有警卽助水師夾擊於攻勦似有裨益奏入

上命軍機大臣傳諭陳金綬雷以誠曰逆賊跨江踞守
原應無分南北會合上下游水陸各軍協力進攻庶
勦辦可期得手現在瓜州一鎮負嵎如故鎮江賊船
勢必不能斷絕來往前經琦善修造多槳礮船卽日
竣工正可乘機扼勦以圖攻克著陳金綬雷以誠迅

11

密籌防勿稍疏失武慶防守浦口尙屬得力近復截
剿賊船屢獲勝仗著卽由陳金綬傳知該總兵仍前
防剿旣須遏賊北竄之衝仍當督飭江浦六合民勇
並與向榮互爲聲援合力廓清江面翁同書所稱浦
口水勇由本地團集不費口糧南岸各州縣亦可倣
照辦理著陳金綬等咨商向榮飭令該地方官相機
籌辦以期聲勢聯絡於攻剿更有裨益

十八日酉乙勝保德勒克色楞善祿崇恩奏言臣

因兵勇攻城屢有傷亡思在城廂切近紮營建
築礮臺以便進攻十二日卯刻出隊明示攻城
暗加修築城上賊衆見我兵在東北角偏近安
營於城頭開放槍礮我兵勇於槍礮如雨之中
冒死趕築西刻濠牆轟就臣因其距城僅有二
三十丈諭各兵勇加意嚴守亥刻賊果率衆來

撲各兵勇待其撲近齊開槍礮賊衆驚退四更
後復行出撲行近濠牆我兵槍礮齊施刀矛攢
刺賊退而復上者再當斃賊數十名賊始奔敗
回城次日加修濠牆趕築礮臺將二千斤鐵礮
移至新營偏近開放轟斃城上賊匪多名現聞
城中一夜數驚若再能於西南兩面偏城紮營
必可制賊死命惜步隊尙單不敷抽撥新鑄大

礮尙須數日現將二千斤洋鐵礮一尊運上新
築礮臺設法進攻奏入

上命軍機大臣傳諭勝保曰逆匪占踞高唐幾及四月
早應移營逼近賊巢用礮攻擊該大臣業經迂緩於
前以致日久尙無把握此時仍當揀選精銳一鼓登
城不得專恃礮轟別無善策儘該逆窮極思竄卽可
乘勢殲除斷不准再令蔓延擾害他處該大臣所帶

兵勇爲數不少所有西南兩面並著趕緊逼近環攻
若再曠日持久勞師糜餉之罪豈能屢邀寬宥耶

十九日

丙戌

陳啟邁奏言據報九江逆艇由湖口

乘風上駛鄱湖將軍廟渚溪口等處經臣飛飭
知府元善等分投堵禦又催羅玉斌急攻潯郡
賊壘以分其勢該署鎮派已革守備吳錫光同
署德化縣知縣戴榮桂於七月十六日出隊進

攻郡城直抵城下斬獲頗多十七日黎明賊船
七八百號蠡擁上竄將抵吳城鎮前河水陸各
勇擊沈賊船十餘隻奈東北風大作逆艇繞由
後湖攏岸勢不可遏我兵退守上游十九日有
賊船三四百號由渚溪駛入建昌縣界之山下
渡適由潯撤回官紳等勇馳至協同該處防兵
擊沈賊船數隻詎賊衆自下游上岸由後抄襲

我軍腹背受敵傷亡不少臣查匪船一千餘號駛入鄱湖分擾吳城建昌地方離省均止百餘里當飛飭革員趙如勝酌帶戰船水勇駛往下游相機勦辦並飭吳錫光等督勇由山下渡陸路追擊惟江省兵勇無多不敷調遣必須迅調大兵剋期殄滅查上年省城被圍經湖南官紳朱孫詒羅澤南等帶勇來江助勦均屬得力懇

請

飭下湖南撫臣選派精銳兵勇三四千名仍令知州朱
孫詒教諭羅澤南等管帶迅速來江協剿庶幾
兵力稍厚可期埽蕩妖氛

陳啟邁又奏言武甯克復後臣當將遊擊富克
金泰等所帶各勇一千五百名仍留該縣以備
不虞茲據探報七月十九日湖北逆匪二萬人

由興國州蠡擁而來當經富克金泰等督帶各
勇臨河迎勦無如匪勢狡猾兵勇無多該遊擊
督戰兩時力竭陣亡各勇亦多死傷武甯城池
甫經收復城內弁兵不過千餘以十餘倍豺狼
之衆攻此殘破小邑誠恐難支現飛飭駐防義
甯州之署鹽道王訓督帶兵勇馳往相機援勦

奏八

上命軍機大臣傳諭陳啟邁曰逆船竄擾吳城建昌距
省均止百餘里該撫現飭革員趙如勝酌帶戰船水
勇駛往下游並飭吳錫光等由山下渡陸路追擊是
否足資截剿本日已諭令駱秉章酌調官兵並派員
管帶馳往協剿惟鄰省調撥尙需時日誠恐緩不濟
急而羅玉斌攻剿九江以分賊勢亦斷難撤回此時
省城情形萬分喫緊必須司道大員帶兵出省相機

堵截未可專待外援任其猖獗臬司惲光宸前曾帶兵出省並未馳赴武甯現在賊氛逼近若仍株守省垣專恃趙如勝等帶兵勦辦勢必貽誤事機著陳啟邁卽於司道中遴派得力之員統兵前往扼要駐紮爲迎頭截擊之計其由興國州竄撲武甯之賊衆至二萬該縣甫經收復城內弁兵不過千餘不敷堵勦並著該撫嚴飭署鹽道王訓迅速帶兵馳往勦辦毋

稍延誤江西與鄂楚毗連處所甚多若楊需等進兵
攻勦前後夾擊更恐逆匪乘隙竄擾江西是內患未
靖又須堵禦外來賊黨防勦稍疏勢必滋蔓難圖著
該撫嚴飭帶兵文武員弁防勦兼籌不得稍涉大意
陣亡之遊擊富克金泰著查明請卹

上又命軍機大臣傳諭駱秉章曰江西賊勢披猖省垣
兵力單薄急需鄰省分兵援救著駱秉章迅卽選派

精兵三四千名馳赴江西以資接應現在朱孫詒羅
澤南皆帶兵勇隨同剿賊甚爲得力該二員能否派
往著該撫酌量緩急妥籌辦理如實在不能分撥卽
著另揀得力員弁管帶所挑官兵迅速馳往江西協
剿毋稍遲緩

陳啟邁又奏言九江地方常有賊船往來經督
糧道鄧仁堃飭德化縣民壯孫亮等設法焚燬

派勇長陳飛鵬夏飛渭馳往幫辦並密札署知
府顏貽曾等督飭辦理七月十二日有賊船千
餘隻續從湖北駛下停泊龍開河內有火藥大
船四隻又有船載羸馬數百匹聚泊一處是夜
孫亮等將漁船裝載柴薪暗藏火藥混入賊船
四更時候西南風大作卽縱火焚燒鳧水上岸
瞥見該賊火藥船轟發延燒各船風狂火烈至

次日巳刻始熄約計焚燬大小賊船四百餘隻
斃匪不計其數內有奔逃上岸者悉被吳錫光
伏勇截殺無遺臣查孫亮等不避艱險深入賊
中自應破格請獎署九江府知府顏貽曾等辦
理尙屬妥密可否量予

恩施奏入

上諭內閣曰長江賊艘肆行無忌此次設法焚燬辦理

尙爲得手民壯孫亮著以把總儘先拔補文童周文
郁著以從九品未入流卽選練勇陳飛鵬夏飛渭均
著以外委拔補並賞給六品頂戴以示鼓勵至署九
江府知府顏貽曾署德化縣知縣戴榮桂均係帶罪
自效之員著該撫查明原案罪名再行請獎